

# 1 Thessalonians

## Paul-ele ayeye nhenhe intelhe-ileke Ngkarte-kenhe areyeke apmere Thessalonica ikwerele-arle anerrirremeke

<sup>1</sup> Ayenge Paul, Silas uthene Timothy uthenenge aneme. Anwerne pipe nhenhe intelhe-ileme Ngkarte-werne-arle utepe-irremeke areye apmere Thessalonica-le-arle anerrirremeke. Arrantherre Ngkarte-kenhe aneme Jesus Christ-kenhe-arlike rarle Alartetye anthurre-arle anwerne-kenhe. Alakenhe ikwerenge anteme anwerne akwetethe Ngkarteke angkeme, arrekantherre Re mwerre arntarnte-aretyenhenge arrantherre mwerre atyenpe anetyenhenge.

*Paul Ngkarteke akangkemele angkeme Thessalonica-arenye areyeke Ngkarte-arle arratyete itelarrerlengenge*

<sup>2</sup> Anwerne Paul, Silas, Timothy-arlike, kele nhenge Ngkarteke angkemele arrekantherre-inpe itirremele aneme, Ikwere akwetethe akangkemele angkeme arrekantherre. <sup>3</sup> Anwerne Ikwere akangkemele angkeme arrantherre-arle Renhe arratyete itelarrerlengenge, alakenhe ikwerenge anteme arrantherre warrke Ikwerenhe mpwareme. Arrantherre Ikwere ahentye anthurre aneme, arrekantherre-arrpe-arlike. Alakenhe ikwerenge anteme arrantherre Ikwere arnterre anthurre urrkaperlte-aneme. Arrantherre Jesus Christ Alartetyeke akarelhemele apetyalptyenheke. Alakenhe ikwerenge anteme arrantherre rlterrke aneme. Anwerne akwetethe Ngkarteke akangkemele angkeme arrekantherre, arrantherre-arle Renhe arratyete itelaremengenge.

<sup>4</sup> Atyewe Ngkarte-kenhe atyinhe areye, Ngkarte arrekantherre ahentye anthurre aneme. Ikwere akangkemele angkeme anwerne-arle itelaremenge arrenhantherrenhe-arle Re akngakerlenge Ikwerenhe anetyeke. <sup>5</sup> Nhenge anwerne arrwekele alheke apmere arrekantherrenhe-werne, Ayeye Mwerre ileke arrekantherre Jesus Christ-akerte. Arrantherre ayeye nhenge arratyte itelaretyakenhe anwerne-kenhe angkentye-ngentyele ware, arrantherre arratyte itelareke Utmenge Ngkarte-kenhele-arle Iterrke-ilekenge, anwerne arrenhantherrenhe arratyte akaltyele-antheke. Lyete arrantherre anwerne urrpetyeke itirremele apeke, nthakenhe-arle anwerne arrekantherrenge arrwekele mwerre anerlenge. Alakenhe-arle anwerne mwerre anemele arrekantherre imernetyeke nthakenhe-arle mwerre anerrirretyeke Ngkarteke akangkentye mpwaretyeke. <sup>6</sup> Nhenge anwerne arrenhantherrenhe akaltyele-anthemele, arrantherre arratyte itelaremenge. Ikwere iperre arrantherre arratyte mwerre anwerne-arteke anetyeke irreme, Jesus-arteke-arlke anwerne ingkirrekeke-arle Alartetye. Alakenhe ikwerenge anwerne itelareme Ngkartele arrenhantherrenhe akngakemenge Ikwerenhe anetyeke. Kenhe arrpenhe areyele akenhe arrenhantherrenhe akurne awelhetyeke mpwareme, arrenhantherrenhe atwemele, arrantherre-arle ayeye mwerre arratyte itelarerlenge anwerne-arle akaltyele-anthekeke. Kenhe arrantherre itnenhe akwenpele aweme, ayeye mwerre Ngkarte-kenhe-ante awemele. Nhenhe ikwerele ureke Utmenge Ngkarte-kenhele arrenhantherrenhe Iterrke atnyenetyame akangkentye mpwaremele.

<sup>7</sup> Arrpenhe Ngkarte-kenhe areye Macedonia-larle anemeke, arrpenhe areye antekerrele-arle apmere Greece

ikwerele anemeke, aweke-arle-iperre arrantherre-arle Jesus arratyte itelaremenge Ikwere mwerre anerrirremele. Itne arratyte mwerre anerrirretyeke ahentye-anemele arrantherre-arteke. <sup>8</sup> Yanhe arratyte anthurre. Tyerrtye areye apmere yanhe atherrele-arle anemeke, itne aweke-arle Ayeye Mwerre Jesus-akerte arrantherre-arle itneke ilerleng. Urreke apeke anwerne alhetyenhenge apmere Macedonia uthene Greece uthene-werne, apmere arrpenhe areye-werne-arlke nthenhele-arle itne kele itelareme arrantherre-arle Ngkarte arratyte anthurre itelaremenge. Alakenhe ikweringe anteme anwerne ahentye-anetyakenhe itneke ilettyeke nthakenhe-arle arrantherre Ngkarte arratyte itelaremenge, itne-arle kele akaltye anerleng. <sup>9</sup> Nhenge anwerne apmere arrpenheke-irremele, tyerrtye areye yanhe ikwerele-arle anemeke itne akwetethe anwerneke arrpenhe areyete-arlke arrekatherre-akerte angkerlte-aneme. Itne anwerneke ileme nhenge arrantherre-arle akwele Ngkarteke atyewe-irreke-arle iperrenge akurnenge utepe-irreke, arrantherre akwele tnaketyakenhe arne akurne apwerte-ngentyele-arlke ure-ngentyele-arlke arrantherre-arle mpwaretyarteke. Itne ileme arrantherre-arle akwele Ngkarte-werne utepe-irreke. Ngkarte-ante arratyte anthurre re. <sup>10</sup> Itne anwerneke ileme arrantherre-arle akwele akarelhemenge Alere Ngkarte-kenhe-arle apetyalpetyenheke alkere akertne-ngentyele. Ngkarte-arle Jesus renhe itethe-ilirtneke rarle ilwekengeng arratyte. Arlte ingkernenge Ngkarte anwerne ingkirrekeke itirretyenhe, anwernenhe arntarnte-aremele akurne-ketye akayake-ilettyenhe. Kenhe angwenhele Alere Ikwerenhe renhe arratyte itelaretyakenhenge Ngkarte itnenhe atwetyenhe.

## 2

*Ayeye Paul apmere Thessalonica-le arnterre urrkaperle-aneme akerte*

<sup>1</sup> Ngkarte-kenhe areye-aye, ayenge awerrirraye. Nhenge anwerne apmere arrekantherrenhe-werne alherlenge, arrantherre anwernenhe inemele untyemurle-irretyakenhele aneke. Arrantherre atningke Ngkarteke atyewe-irreke-arle anwerne arrekantherre Ngkarte-akerte ilerlenge-iperre. <sup>2</sup> Arrwekele anwerne apmere Philippi-le urrkaperlte-aneke, apmere yanhe ikwenge areye arnterre anthurre ahele-irremele anwerneke angkeke, itne anwernenhe arnterre atwemele. Arrantherre yanhe ikwere-akerte akaltye. Nhenhe ikwere-iperre anwerne Thessalonica-werne alheke, arrpenhe areyele anwernenhe ayaketyeke ayeye Jesus-akerte ileme-ketye. Nhenhe ikwerele ureke, Ngkartele anwernenhe arntarnte-aretyame, Ikwenge anwerne atere-irretyakenhe aneke. Re anwernenhe atnerre-ileke anwerne-arle arrekantherre ikwere-akerte ilettyeke. <sup>3</sup> Kele nhenge anwerne Ayeye Mwerre-akerte ilemele, anwerne tyerrtye areye atnerre-ileme Ngkarte apenterlte-apetyeke, itne imerte ayeye renhe atnyenyenyehenge. Nhenge anwerne ayeye ilemele itneke urrttyirretyakenhele ileme, itirrentye arratyekerte aneme. <sup>4</sup> Ngkartele itelareme itirrentye anwerne-kenhe arratyekerte-arle. Alakenhenge re akangkeme. Re anwernenhe ayeye mwerre antheke, anwerne-arle apmere arpe anenhele ayeye renhe ilerlte-apemenge. Anwerne itnenhe amantye-aketyakenhe, itne anwerneke mwerre aketyenhenge, arrangkwe-arle. Anwerne Ngkarteke warrke-irrerlte-aneme Re anwernenhe mwerre aketyenhenge. Ngkartele itelareme nthakenhe-arle anwerne itirremenge, mwerre apeke akurne apeke.

<sup>5</sup> Nhenge anwerne apmere arrekatherrenhele anemele, anwerne amantye-aketyakenhe arrantherre-arle anwernenhe mwerre aketyenhenge. Anwerne-arle ankeye akngerre anetyakenhe aneke, anwerne apwarte ngkweltye arrekatherrenge inetyeke ahentye-anetyakenhe. Ngkartele areme anwerne-arle alakenhe mpwartyakenhenge. Anwerne Ayeye Mwerre ileke ware. <sup>6-7</sup> Anwerne ayeye arratye ilerlte-apeme warrke Ngkartekenhe mpwarerlte-anemele arrantherre-arle Ngkartante ware tnaketyeke, anwerne-kwenye. Anwerne ayeye akngernentye akngerre Jesus Christ-kenhe areye iperrenghe, anwernele arrenhantherrenhe uternemere anwernenhe apwarte ngkweltye anthetyeke, kenhe arrangwe-arle, anwerne-arle alakenhe itirretyakenhe-arle. Arrekatherrenge arternpe ware anemele arntarnte-areke, meyele ampe akweke ikwerenhe areye arntarnte-areme-arteke. <sup>8</sup> Anwerne arrekatherre ahentye anthurre aneme. Alakenhe ikweringe anteme anwerne Ayeye Mwerre akangkemele ileke Ngkartele-arle anwernenhe anthekeke. Anwerne akngerre anthurre urrkaperlte-aneke ayene-iletyakenhe arrenhantherrenhe atnerre-iletyeke, anwerne-arle arrekatherre ahentye anthurre anerlenghe.

<sup>9</sup> Atyewe Ngkarte-kenhe atyinhe areye, nhenge anwerne arrekatherrenge anemele itelaraye, anwerne arrekatherre Ayeye Mwerre ileke. Anwerne urrkapetyarte ingwe-akakele arlte-akakele apurrke-ante-irretyeke-atwetye apwarte ngkweltyeke merne inetyeke. Anwerne-arle arrenhantherrenhe layaketyakenhe-arle apwarte ngkweltyeke. Anwerne arrekatherre Ayeye Mwerre iletyeke ahentye-anemele ware. <sup>10</sup> Arrantherre anwernenhe itelareme, Ngkartele anwernenhe itelareme anteye. Nhenge anwerne

arrekatherrenge anerrirremele, anwerne Ngkarteke arratyentye anerrirretyarte, arrekatherre anteye. Anwerne-arle akurne mpwaretyarte, arrpenhe areye anwerneke tyele angkeme-ketye. <sup>11</sup> Arrantherre anwerne-akerte akaltye aneme, nthakenhe-arle anwerne arrenhantherrenhe atnerre-ileke akngeyele ampe ikwerenhe areye atnerre-ileme-arteke. Alakenhe-arle anwerne arrenhantherrenhe atnerre-ileke Ngkarteke rlterrke-iletyeke. <sup>12</sup> Anwerne arrenhantherrenhe akwetethe atnerre-iletyame arraty mwerre anerrirretyeke Ngkarteke, Re anteme arrenhantherrenhe aremele akangkentye anetyenhe arrekatherre. Re arrenhantherrenhe akngakeke Ikwerenheke-artweye anetyeke, arraty mwerre anerrirretyenhenge. Re Alartetye mwerre anthurre anwerne-kenhe, arrenhantherrenhe rlterrke akngerrele atnyenetyenhe akwete-ante. Re arrekatherre ahentye-aneme Ikwerenge akwete-ante anerrirretyeke, artangentyele urrkaperlte-anetyeke Ikwerenge. Alakenhe ikwerenge anteme Re arrenhantherrenhe akngakeke.

<sup>13</sup> Nhenge arrantherre ayeye nhenhe arrwekele awerrirremele anwerne arrekatherre akngetyerlenge, arrantherre arraty itelarerrirreke. Nhenhe ikwere arrantherre itirretyame, “Ayeye nhenhe-arle tyerrtye arrpenhe areye-ngentyele kwenye-arle, arrangkwe. Nhenhe-arle ayeye Ngkarte-kenhe-arle!” Arraty apelaye, nhenhe-arle ayeye Ngkarte-kenhe arraty. Lyete re arrekatherrele-arlenge aneme. Alakenhe ikwerenge anteme arrantherre mwerre-irreme, itirrentye mwerre-akerte. Alakenhenge anwerne Ikwere akangkemele angkeme anteye. <sup>14</sup> Atyewe Ngkarte-kenhe areye, arrantherre Ngkarte-kenhe arrpenhe areye-arteke Judea-nge, itne Ngkarte uthene Jesus Christ uthene-

kenhe aneme. Jew areyele apmere ikwere-arenye-arle itnenhe uyarne ayakeme Jesus Christ apenteme-ketye. Itne-arteke, arrekantherrenhe areye arrenhantherrenhe uyarne ayakeme-arteke. Itne arrekantherre tyele angkeke, arrenhantherrenhe atweke arrantherre-arle Jesus arratyete itelarerlenghe.

<sup>15</sup> Arrule aneke Jew-arenye areyele atweke yanhe areye angkentye Ngkarte-kenhe awemele ilerle-apentye akngerre itneke. Nhenhe ikwere-iperre Jew-arenye arpenhe areyele Jesus atweke, Alartetye anwerne-kenhe-arle. Ikwere iperre Jew-arenye arpenhe areye anwerneke ahentye-anetyakenhe apmere itnekenhele anetyeke, anwernenhe itne aywepeke. Itne Jew anetyakenhe areyeke ahentye-anetyakenhe. Alakenhe ikweringe anteme Ngkarte itneke ahele-irreke. <sup>16</sup> Anwerne anteme Ayeye Mwerre iletetye ahentye-aneme Jew anetyakenhe areyeke, Ngkartele itnenhe itethe-iletienhenge akurne-ketyenge. Alakenhe irreketye, Jew-arenye areyele anwernenhe akwetethe ayaketyenge. Jew-arenye areyele akenhe akwetethe akurne mpwarepareke Ngkarte-ketye, Ikweringe untyeme-irreke. Itne akurne mpwarewarreke atningke-ngare. Arlte lyete perre itne akurne akwete mpwarerlte-aneme Ngkarte anteme itneke ahele anthurre irreme. Alakenhe ikweringe anteme Ngkartele itnenhe atwetyenhe, itneke akurne anthurre irreme.

*Paul apmere Thessalonica-werne alpetyeke ahentye aneme itnenhe aretyeke*

<sup>17</sup> Atyewe Ngkarte-kenhe atyinhe areye, anwerne arrekantherrenge apmere Thessalonica-le anetyarte, kenhe arpenhe areye yanhele-arle anetyarteke itne anwerneke

ahentye-anetyakenhe aneke. Itne anwernenhe ileke apmere yanhenge arlengele ulkere impelhetyeke. Kele anwerne itneke-ketyenge arlenge ulkere anetyarte. Nhenhe ikwerele ureke anwerne arrekantherre itirretyarte. Anwerne ahentye-aneme anthurre arrenhantherrenhe aretyeke alhetyeke. <sup>18</sup> Ayenge Paul-arlike, ayenge apmere arrekantherrenhe-werne alpetyeke ahentye aneme, kenhe arrangkwe-arle. Ayenge urrpetye-ngare arrkerneke, kenhe Arrentye Satan-ele ayenge ayakerlenge arrekantherre alpeme-ketye. <sup>19-20</sup> Lyete ulkere arrantherre Ngkarteke arraty mwerre aneme. Kele alakenhe re arrantherre anwerneke akangketyeke mpwareme. Nhenge Jesus apetyalpemele, arrantherre ikwerenge arrwekele tnetyenhe apure-kwenye. Anwerne ikwere iletienhe arrantherre-arle anwernenhe arraty itelarekenge, nhenge anwerne Ayeye Mwerre arrekantherre arrwekele ilemele. Anwerne ikwere iletienhe nthakenhe-arle arrantherre arraty anekenge. Anwerne arrekantherre akangketyenhe arrantherre-arle rltterke tnerlenge ikwere. Arraty anthurre-arle. Arrantherre anwernenhe akangkentye mpwareme. Anwerne ikwere arrekantherre-akerte ingkirreke iletienhe. Alakenhe ikwerenge anteme Ngkarle anwernenhe mwerre aketyenhe.

### 3

<sup>1</sup> Alakenhe ikwerenge anteme anwerne ahentye-aneke arrenhantherrenhe aretyeke, anwerne akenhe uyarne alheme. Arraty anwerne layakerretyarte, “Nthakenhe-arle-ame anwerne-irreye nhenhe areyeye?” Nhenhe ikwere-iperre Silas ilerne itelareke anerle-anerretyeke apmere Athens-enge. <sup>2</sup> Ilerne arrekantherre-werne Timothy yerneke ilerne-arle uyarne alhemenge. Re atyewe



Ngkarte-kenhe ilerneke. Re Ngkarteke urrkaperle-apeme, anwernenge-arlenge-arlke urrkaperle-apeme arpenhe areyeke ileme Ayeye Mwerre Jesus Christ-akerte. Ilerne akaltye aneme arrantherre-arle Ngkarte arratyte itelaremenge, anwerne anteme renhe arrekantherre-werne yerneke arrenhantherrenhe akangkentye mpwaretyeke, atnerre-ilemele Jesus apenterlte-apetyeke. <sup>3-4</sup> Arrwekele-arle, nhenge anwerne arrekantherrenge anemele, anwerne arrekantherre ileke arpenhe areyele-arle arrenhantherrenhe arlkarentye-iletyeke arrekantherre ahele angkerremele arrantherre-arle Jesus apenterlenge. Yewe, urreke Timothy apetyetyehenge, arrantherre-arle Jesus akwete-arle apentewarreyarte, alakenhe ikweringe anteme arpenhe areye arrekantherre ahele angkerreke arlkarentye-iletyeke ahentye-aneke. Anwerne ahentye-anetyakenhe arrekantherre Jesus-nge impelhetyeke. Alakenhe irreke arrantherre-arle Ngkarte apenterlenge, anwerne arrekantherre ileke-arteke. <sup>5</sup> Kenhe nhenge the ayeye nhenhe aweke-arle iperrenge, arrekantherre ayenge arnterre anthurre itirreke. Ayenge itirreke, "Arrentye Satan-ele apeke itenenhe Ngkarte-ketye untyeme-iletyeke arrkernetyenhe." Alakenhe rarle itirrentye atyinhe. Alakenhe ikweringe anteme anwerne Timothy yerneke re anwerneke apetye-alpemele iletyehenge arrekantherre-akerte, arrantherre apeke Jesus arratyte itelareme akwete. Arrentye Satan-ele apeke arrenhantherrenhe untyeme-ilerlenge Ngkarte-ketyenge akwele, anwerne arrenhantherrenhe apelkele akaltye-antheke anteme.

<sup>6</sup> Arrekantherrele-arlenge anerle-aneke-arle iperre, Timothy apetye-alpemele ayeye mwerre akngetye-alpeke anwerneke ilemele arrantherre-arle Ngkarte arratyte anthurre itelaremenge arrantherre-arle Ikwere ahentye an-

thurre aneme, Ngkarte-kenhe arrpenhe areyeke-arlike. Re anwerneke ileke anteye arrantherre-arle anwerneke mwerrentye itirrepirreme, anwernenhe aretyeke ahentye aneme, anwerne-arle arrenhantherrenhe aretyeke ahentye-aneme-arteke.

<sup>7</sup> Atyewe Ngkarte-kenhe atyinhe areye, apmere nhenhe-arenye areyele anwernenhe uterneme ahele angkerretyeke, anwerne akurne anthurre anteme awelhemenge. Kele mwerre-arle. Anwerne akangkeme, alhwarrpe-kwenye arrantherre-arle Ngkarte akwetethe arratyete itelarerlengenge. <sup>8</sup> Anwerne mwerre anerlte-aneme arrantherre-arle Jesus Anwerneke-artweye arratyete itelarerlte-anerlengenge. <sup>9</sup> Nhenge anwerne Ngkarteke angkeme, anwerne akangkeme arrantherre-arle mwerre anerlte-anerlengenge Ngkarteke. Alakenhe ikweringe anteme anwerne Ngkarteke akangkeme angkeme arrekantherre. <sup>10</sup> Yewe, alakenhe ikweringe anteme anwerne Ngkarte apayuthneme arltele-akake ingwele-akake anwerne apmere arrekantherrenhe-werne yatyerre alhetyeke, arrekantherre awethe-ame-awethe ilettyeke ayeye Ngkarte-akerte. Ikwere iperrenge apeke arrantherre akaltye-irretyeke awethe ulkere akaltye anthurre anetyenhenge. <sup>11</sup> Anwerne Ngkarte uthene Jesus utheneke arrekantherre alakenhe angketyeke, “Iwerre altywere-ilaye anwernekengenge arrekwele-irremele, anwerne Thessalonica-werne alhetyeke itnenhe aretyeke. <sup>12</sup> Jesus Anwerneke-artweye, anwerne ngenhe apayuthneme Thessalonica-arenye areyeke itne apurte mwerrentye anerlte-anetyeke, itne anteme akangelhe-ilerremele anetyeke, anwerne ahentye-aneme Ngkwengenge akangkentye mpwaretyeke-arteke. <sup>13</sup> Anwerne Ngenhe apayuthneme Thessalonica-arenye areyeke Unte itnenhe atnerre-ilettyeke itne Ngenhe

arratye itelaremele apentetyenhenge anteme.” Alakenhe ikwerenge anwerne angkeme arrekatherre. Urreke nhenge Jesus apetye-alpemele arntyele ikwerenhe areye-akerte, arrantherre Ikwerenhe areye anetyenhe anteye. Kele imerte arrantherre Ngkartenge arrwekele tnerrirenge Re arrenhantherrenhe ilpernetyakenhe aneme. Re arrekatherre-ketye untyeme-irretyakenhe-arle anetyenhe.

#### 4

*Paul-ele Thessalonica-arenye areye akaltyele-antheme nthakenhe Ngkarte akangkentye mpwaretyeke*

<sup>1-2</sup> Ngkarte-arenye areyaye, nhenge anwerne apmere arrekatherrenhenge arrwekele anemele, anwerne arrenhantherre ileke nthakenhe Ngkarte akangkentye mpwaretyeke. Jesus Alartetyele ayeye nhenhe renhe anteme ileme. Lyete arrantherre iwerre mwerrele akwete anerlte-aneme Ngkarte akangkentye mpwaremele. Anwerne arrekatherre ilettyeke ahentye aneme Ngkarte akangkentye mpwaretyeke awethe-ame-awethe, arlte arrpe-anenhele iwerre mwerrele anerrire. <sup>3-7</sup> Ngkarte anwernenhe akngakeke anwerne Ikwere arratye anetyeke, Ikwerenhe areye-arteke. Kenhe anwerne apeke untheme arelthe arrpenhenge apeke, artwe arrpenhenge apeke mpwenye untelhe-ilettyeke, Re anteme anwerneke akangkentye anetyakenhenge. Nhenhe ikwerenge, Ngkarte arrekatherre angkeme: “The arrenhantherre akngakeke, tyerrtye arrekatherrenhe Atyinhe-arle. Alakenhe ikwerenge anteme Atyenge mwerre anerrirettyeke tyerrtye ingkirrekele arrekatherrenhe, akurne mpwareme-ketye.” Nhenhe rarle Ngkarte angkeme artwe ingkirrekeke: “Tyerrtye arrekatherrenhe Atyinhe. Ayenge utyernemele tnakaye

tyerrtye arrekatherrenhele. Akwete anerrirraye anewe arrekatherre-arlange-ante ware. Arelhe arrpenhe areye impaye, tyerrtye arrekatherrenhele akurne mpwaretyale, arrpenhe areyeke alhirretyale anaye.” Tyerrtye alakenhe-arteke areye-arle Ngkarteke akutne-arle. Itne arlaketelherlte-anemele arne akurne areye mpwarerlte-anemele, nhenhe akurne-arle. Alakenhe mpwaretyale! Nhenheke rarle Ngkarte arrekatherre angkeme. “Atyewe Ngkarte-kenhe arrekatherrenhe areye akurne mpwaretyale. Anewe arrpenhe-kenhe mpwenye akngetyale!” Ngkarte arnterre ahele-irretyenhe. Kenhe arrpenhe areye akenhe arlaketelherlte-arle arne akurne mpwarerlte-anemele, Ngkarte itneketye untyeme-irretyehenge. Alakenhe rarle anwerne arrenhantherrenhe akaltyele-antheke, alkngarre-ilettyeke. <sup>8</sup> Arrantherre apeke ayeye nhenhe awetyeke ahentye-anetyakenhe, arrantherre-arle anwernekenge untyeme-irretyakenhe-arle, arrantherre-arle untyeme-irreme Ngkartenge-tetye. Rarle arrenhantherrenhe Utmenge Mwerre antheke.

<sup>9</sup> Ngkarte Re-arrpele arrenhantherrenhe akaltyele-antheke arrantherre akangelhe-ilerrettyeke. Iwenhenge-ame anwerne arrenhantherrenhe ayeye rante-rante ileme? <sup>10</sup> Arrantherre kele ahentye anerrirreme Ngkarte-kenhe arrpenhe areyeke apmere Macedonia-larle anemeke. Alakenhe renhe akwete mpwarewarre, awethe-ame-awethe.

<sup>11</sup> Atwerretyale anaye, ahele-ahele akerrretyale, arrpenhe areyenge apurte-irretyale arrekatherrenhe anetyakenhenge. Arnterre urrkaperlte-anaye apwerte ngkweltye inetyeke merne inerlte-anetyehenge, anwerne arrekatherre mpwaretyeke ileke-arteke arrekatherrenge anemele. <sup>12</sup> Arrantherre apeke

urkapetyakenhe, arrantherre anteme arrpenhe areye-  
arle apayuthnetyenhe merneke, apwerte ngkweltyeke-  
arlke. Ngkarte-kenhe anetyakenhe areyele apeke  
arrenhantherrenhe areme alakenhe mpwarerlenghe,  
itne arrnhantherrenhe akurne aketyenhe, itne anteme  
Jesus-ketyenge untyeme-irretyenhenge.

*Ayeye Jesus ahelhe nhenhe-werne apetye-alpetyenhe akerte*

<sup>13-14</sup> Atyewe Ngkarte-kenhe anwerne-kenhe areye,  
anwerne arrekantherre ilettyeke ahentye aneme Ngkarte-  
kenhe areye-akerte uyerrekeke-arle, arrwekelenyeker-  
artweye areye-akerte, Jesus-arle arratyete itelarerrirrekeke  
urreke itne ilwetyenhenge. Anwerne itelarerrirreme  
Jesus-arle ilweke imernte itethe-irirtnemele. Urreke  
Ngkartele Jesus ahelhe nhenhe-werne yernetye-  
alpetyenhe imerte ilweke-arle areye itethe-ilirtnetyenhe.  
Itethe-ileke-arle iperre Re itnenhe alkere-werne  
akngirtnetyenhenge Jesus-nge anetyeke. Alakenhe  
ikwerenge anteme, alhwarrpe-akerte anerrirretyale  
Ngkarte-kenhe anetyakenhe areye-arteke-arle. Itne  
itelarerrirretyakenhe, anwerne Ngkarte-kenhe areye-  
arle itethe-irirtnerlthe-iwetyenhe ilweke-arle iperrenghe  
Jesus-enge anerrirretyenhe. Itne alhwarrpe-akerte  
aneme akutne-arle nhenhe ikwere-akertenge.

<sup>15</sup> Anwerne arrekantherre ayeye arrpenhe ilettyeke  
ahentye aneme Jesus Alartetyele-arle ilekeke. Nhenge  
anwerne apeke itethe anerrirrerlenghe, Jesus-arle  
apetye-alpetyenhe. Nhenhe ikwere-iperre, yanhe  
areye kele-arle ilweke-arle, itne ikwerenge arrwekele  
alherlthe-iwetyenhe. Nhenhe ikwere-iperre anwerne  
itnekenge ingkernele apetyetyenhe. <sup>16-17</sup> Urreke  
Jesus Alartetye anwerne-kenhe akertne-ngentyele  
atnarnpetyenhe, re Ngkarte-kenhe areyeke arlketyenhe

kele-arle ilwekeke itethe-irritnetyeke. Alkere-arenye alartetye Ngkarte-kenhe anyente arlketyenhe. Ikwere iperre arrpenhele trumpet pewe-iletyenhe tyerrtye ingkirreke akaltye anetyenhenge Ngkartele-arle Ikwerenhe areye anyente-ilemenge. Nhenhe ikwerele ureke, nhenge arrpenhele trumpet-arle pewe-ilerlenge, Ngkarte-kenhe areye kele-arle ilwekeke, Ngkartele itnenhe itethe-ilirtnetyenhe ilweke-arle-iperre. Itne anwernekenge arrwekele alherlte-iwetyenhe. Anwerne apeke itethe akwete anerrirreme, Ngkartele anwernenhe anyentelhe-iletyenhe angkulye-werne akertne-atheke-ileme Jesus-nge alkere mpwepeke anyente-irretyeke. Anwerne imerte Jesus-ele-arlenge akwete-ante anthurre anetyenhe. <sup>18</sup> Ayeye Jesus-akerte ilerrerte-anaye. Itnenhe ilerlte-apaye akangkemele anetyeke, arrpenhe areye-arteke anetyakenhe Ngkartenge untyeme-irrerlenge-arle.

## 5

*Anwerne ingkirreke Jesus-eke akarelhetyeke rarle apetye-  
alpetyenheke-atwetye*

<sup>1-2</sup> Atyewe Ngkarte-kenhe anwerne-kenhe areye, anwerne itelarerrirreme Jesus ilengare apeke-arle awethe apetye-*alpetyenhenge*. Kenhe anwerne ilengareke akutne. Arrantherre-inpe itelarerrirreme ayeye nhenhe Jesus-akerte. Nhenge re apetye-*alpemele*, arratetyenhe impeltye-*ngentyele-arteke*, nhenge ingkirreke akwenpele anerrirrerlenge. <sup>3</sup> Urreke Jesus ahelhe nhenhe-werne apetye-*alpetyenhenge*, tyerrtye arrpenhe areye alakenhe angketyenhe, “Nhenhe mwerre akngerre anthurre. Nterte anthurre atwerretyakenhe. Anwerne mwerre anthurre aneme. Arrpenhe areyele anwernenhe atwetyakenhe, anwerne iwenhe apeke

ikwere-ketye atere-irretyakenhe.” Itne alakenhe angkeme nhenge Jesus apetye-alperlenge, itirreme ingkirreke mwerre akwele anemeke-athene. Kenhe re akenhe impeltye-ngentyele apetyetyenhe itneke akurnelhe-ileme. Itne Ikwere-ketye alwirretyenhe uyarne anthurre alengke-iwelheme itne-arrpe itethe atnyenetyeke.

<sup>4</sup> Itne akurne nhenge areye ingwemertele-arle anemeke. Kenhe arlte ingkernenge, nhenge Jesus apetye-alperlenge itne atnulketyenhe anthurre renhe aremele, itne-arle akwenpele anerrirrekenge Ngkarte awetyakenhe. Kenhe arrantherre akenhe Jesus arratye itelaremele-arle akurne-ketyenge untyeme-irreke, ingwemertele-arle anetyakenheke, kele arlte ingkernenge arrantherre atnulketyakenhe anetyenhe, irrpelthele-tetye tnetyenhe nhenge Jesus apetyalpetyenhenge. <sup>5</sup> Arrantherre irrpelthele tnerrirretyeke alnggenthele-arle anerrirrekenge, Jesus-kenhe aneme anteye. Arrantherre-arle Jesus-eke akwetethe arelherlte-aneme, mwerre mpwaremele, alakenhe ikwerenge anteme arrantherre akangkemele anetyenhe ilengare apeke re apetye-alpetyenhenge. Anwerne Ngkarte-kenhe areye arrpenhe areye-arteke anetyakenhe, nhenge areye ingwemertele-arle anemeke, akurne-arle mpwaremeke. <sup>6</sup> Alakenhe ikwerenge anteme anwerne ingkirreke akwetethe arelhetyeke Jesus-eke-arle apetye-alpetyeke arratye mwerre akwete anerlte-aneme. Anwerne arrpenhe yanhe areye-arteke anetyakenhe ankwe akwete-arle anekeke. Anwerne arnterre anthurre itirretyeke akarre anetyeke, akurnentye-werne-atheke alheketyenge. <sup>7</sup> Ankwe-arle inteme areye, itne ingwele inteme. Arrpenhe areyele ngkwarle-arle antywemeke, itne arerte-irremele ingwele antyweke-arle-iperre. Itne

itirretyakenhe nthakenhe-arle irretyenhe-akerte Jesus-arle apetyalpetyenhenge. <sup>8</sup> Anwerne-tetye alkngenthe Ngkarte-kenhele aneme arrpenhe areye-arteke kwenye, yanhe areye ingwemertele-arle anerrirremeke. Alakenhe ikwerenge anteme anwerne arnterre itirretyeke akurne mpwareme-ketye. Anwerne Jesus akwetethe arratye itelaremele anetyeke, ikwere ahentye anthurre anetyeke, arrpenhe areyеke-arlke. Anwerne Jesus-еke arelhemele anetyeke rarle apetye-alpetyenhenge awethe, anwerne akutne ilengare-arle re apetye-alpetyenheke. Nhenge re akenhe apetye-alpemele, re anwernenhe arntarnte-aretyenhe akayake-ilemele. Anwerne apeke alakenhe-arteke mwerre anerlenge, anwerne rlterrke anetyenhe artwe irraweye anthurre-arteke, nhenge areye-arle mwekarte rlterrke akaperteke arrernelheme-arteke, alkwerte itne akngerneme itnenhe-arrpe ilpelhetyeke.

<sup>9</sup> Nhenhe-arteke anwerne ilpelhetyeke, Ngkartele-arle anwernenhe akngakerlenge, anwernenhe akurne-iletыеke-kwenye. Rarle anwernenhe akngakeke Jesus-ele anwernenhe arntarnte-aretyeke akayake-ilemele. Alakenhe ikwerenge anteme Ngkartele Jesus ahelhe nhenhewerne yerneke anwernenhe arntarnte-aretyeke akayake-ileme, itetheke mpwaretyeke. <sup>10</sup> Re anwerneke arne arntarlkweke-arleke ilweke, anwerne ikwerenge akwete-ante anerrirretyenhenge. Re nhenge ahelhe nhenhewerne apetyalpemele, anwerne apeke itethe akwete anerrirreme, anwerne arrpenheme apeke kele ilwerrirreke. Kele mwerre rarle. Nhenge re apetye-alpemele anwernenhe ingkirreke anyentelhe-iletыеnhe akngirt-neme ikwerenge akwete-ante anetyeke. <sup>11</sup> Arrantherre-arle kele ilerrerlte-aneme Jesus-arle apetye-alpetyenhe-akerte. Yanhe re mwerre-arle. Arrantherre ayeye nhenhe akwete ilerrerlte-anetyeke, akaltyele-antherremele ar-



ratye mwerre anerrirretyeke Ngkarteke, Jesus akwete apenterlte-apetyeke.

<sup>12</sup> Atyewe Ngkarte-kenhe anwerne-kenhe areye, angwenhe apeke re arnterre warrke-irreme Jesus-eke, arrenhantherrenhe arntarnte-aremele, arrenhantherrenhe akaltyele-antheme ikwere-akerte, akurne-ketyenge untyeme-ilemele, arrantherre awetyeke nthakenhe-arle arrpenhe yanhe areye angkemeke.

<sup>13</sup> Itneke akangkwe-irremele ahentye-anetyeke itne-arle arrekantherre mwerre urrkaperlte-anerlenge. Arrantherre apurte anetyeke ahele-ahele akerrityale, arrpenhe areye arlkarentye-iletyle. <sup>14</sup> Angwenhe apeke urrkapetyeke ahentye-anetyakenhe, ikwere angketyeke warrke inetyeke-akerte. Angwenhe apeke atere-irreme, renhe ilaye atere-irretyale. Angwenhe apeke itirremele impelhetyeke Jesus apenteme-ketye, ikwere angkaye renhe atnerre-ilaye re Jesus arratyale apentetyenhenge. Angwenhele apeke arrenhantherrenhe atweme renhe iltetyale, akangkentye ware anaye. <sup>15</sup> Arrenhantherrenhe arrpenhele atweme apeke, renhe atwirtnetyale. Arntarnte-arerraye, kele imerte arrpenhe areye anteme arntarnte-aremele.

<sup>16</sup> Akangkentye akwetethe anerlte-anaye. <sup>17</sup> Ngkarteke akwetethe angkerlte-anaye, impelhetyale. <sup>18</sup> Nhenheke rarle Ngkarte arrekantherre angkerle-aneme Jesus-kenhe-arle areyeke: Kele iwenhe apeke nthakenhe-arle irreme, mwerre apeke, akurne apeke, kele mwerre-arle! Akwetethe Ngkarte utyernemele tnakewarreye.

<sup>19</sup> Nhenge Utmenge Mwerre arrekantherre iwenhe apeke ikwere angkerlenge, renhe awerrirretyeke, ikwere-ketyenge untyeme-irretyalaye, renhe ipmentye-iwetyalaye. <sup>20</sup> Arrpenhe akwele rarle arrekantherre angkemeke Utmenge Mwerreke, renhe mwantyele awaye,

untysteme-irretyale. <sup>21</sup> Ayeye mwantyele awerrirraye, ayeye yanhe arratyete apeke urrtirrentye apeke. Ayeye arratyete apeke-arle renhe awerrirretyete. <sup>22</sup> Ayeye urrtirrentye apeke, awerrirretyete anaye.

<sup>23</sup> Arrantherre mwerre anerlte-aneme, arrantherre-arle Ngkarte arratyete itelaremenge iperre. Anwerne Ngkarteke angkerlte-aneme arrekatherre, arrantherre mwerre anetyenhenge. Anwerne Ngkarteke angkeme Re arrenhantherrenhe mwantyele arntarnte-aretyete ut-nenge arrekatherrenhe arratyete mwerre atnyenetyete, akurne-ketyenge akayake-iletyete. Nhenge Jesus Christ ahelhe nhenhe-werne apetye-alpemele, arpenhele arrenhantherrenhe ilpernetyakenhe aneme. <sup>24</sup> Ngkarte arrenhantherrenhe akngakeke Renhe apentetyete. Re arrekatherre akwetethe arratyete ileme, alakenhe ikw-erenge anteme arrantherre itelaretyete Rarle arrenhantherrenhe arntarnte-areme akwete anthurre.

<sup>25</sup> Atyewe Ngkarte-arenye anwerne-kenhe areye, Ngkarteke anwerneke akwetethe angkerrirraye, arrekatherre anwerne angkeme-arteke. <sup>26</sup> Arrantherre ingkirreke Jesus-kenhe. Nhenge arrantherre anyente-irreremele arne iwenhe apeke renhe mpwaretyete imernetyete arrantherre-arle arntarnte-arerreme.

<sup>27</sup> Jesus-ele ayenge ileke pipe nhenhe intelhe-iletyete. Alakenhe ikwerenge anteme arrantherre apurte-irreremele tyatyete-ke, arnterre read-eme-ilaye Ngkarte-kenhe arpenhe areyele awetyete.

<sup>28</sup> Kele anwerne pipe nhenhe renhe intelhe-ilemele uyerrelhe-ileke. Anwerne Jesus Christ apayuthneme akangkentyete arrekatherrenge anetyete. Kele.

Angkentye Mwerre  
Portions of the Holy Bible in the Central and Eastern Arrente  
language of Australia

copyright © 2002-2014 Wycliffe Bible Translators

Language: Eastern Arrente (Arrente, Eastern)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 12 Jun 2019 from source files dated 5 Mar 2019

26bd077a-984c-5596-a099-f37f2651f363